

KANI MELE.



He hapa o ke Kanikau no ka make ana o
Keeaumoku o ke Alii o Maui.

Ue, ue, ua make kuu Alii,
Ua make kuu haku a kuu hoa,
Kuu hoa i ka wa o ka wi,
Kuu hoa i paa ka aina,
Kuu hoa i kuu ilihune,
Kuu hoa i ka ua a ka makani,
Kuu hoa i ka wela o ka la,
Kuu hoa i ke anu o ka mauna,
Kuu hoa i ka ino,
Kuu hoa i ka malie,
Kuu hoa i mau kai ewalu;
Ue, ue, ua hala kuu hoa,
Aole e hoi hou mai.

Lama Hawaii.

Lahaina, Detemaba 6, 1834.

Ke hai aku nei au i kekahi hakaka
a ko Borabora kanaka ma keia wahi.

Ku mai la kekahi moku o kohola, o
Generale Iakesona ka inoa. O Kemika
(Capt. R. Smith) ke alii o ka moku.
I ka la 16 o Novemaba e kuai i ka ai a
me na mea hoi e ae. Haalele iho la
ia ia na kanaka Borabora elua me ka
manao, e noho loa maanei.

Olelo aku la ua mau kanaka la i
ke alii o ka moku, "E hookaa mai oe
i kau aie ana ia maua, no ka mea, aole
loa maua e holo hou aku me oe." Ole-
lo mai la ke alii o ka moku ia laua.
"Alia, a hiki aku kakou ma Amerika,
no ka mea, pela kakou i hoolimalima
ai. A ina e haalele olua ia'u, alaila
aole loa au e uku aku ia olua."

Nolaila huhu loa ua mau Borabora la
a ohumu pu aku la me na Borabora e,
e hoohalua a e lalau ia ia. Hoohalua
no iho la lakou, aole i lalau ia ia, no
ko lakou makau paha, aka hapai ae la
lakou i kona waapa a lawe aku la iuka.
Holo wikiwiki kekahi kanaka, a hai
aku la ia Hoapili i ka lakou hana ana.

Kauoha mai la o Hoapili i kona poe
kanaka, e hele koke a e hooki ia lakou,
a e hoihoi i ka waapa.

I kekahi la mahope mai hoopii aku
la o Kemika ia Hoapili, a nonoi i kona
kokua ana mai. Olelo mai la o Hoapi-
li, "Ua hewa lakou, he poe powa, ua
ku e lakou i ko'u mau kanawai. Nolai-
la, ke hookolokolo aku nei au ia lakou,

penei, O ua mau Borabora la elua, i ha-
lele i kou moku, na'u e hoopaa ia laua i
ka hao, iloko o ka papu, i na la a pau au
e noho maanei. A holo kou moku, na
laua e hooponopono i ke alanui, ma
Launiupoko a hiki ma Olowalu. O na
Borabora e kekahi, kapoe i hana hewa
pu me laua, ke kauoha aku nei au ia
lakou, e haalele loa i keia wahi, i kela
manawa a me keia manawa, a na mo-
ku, e ku mai maanei."

O ko'u manao, aohe uuku ka hewa ma
keia hana ana. Ina e aihue na kana-
ka i ka waapa, mamuli paha olohani
lakou a e lilo kekahi moku ia lakou.

Eia kekahi manao. He hoailona ke-
ia, he mea e hoike ai i ka mana o na alii.
Ina e haalele ia mau Borabora i ka
Hoapili olelo a hoopai ole oia ia lakou,
malaila paha e akaka ai ka hemahema
o ke kanawai; aka, ina e hoopai pono
ia lakou e like me ka Hoapili olelo,
alaila maopopo ka hiki ole o na kanaka
ke hoowahawaha i na'lii. Aole nae
au i ike pono i ka hope o keia mea.

A. C.

TAHITI. Ua kapu ka rama ma Tahiti
ka aina a Pomare i hoomalu ai. Na
ko laila alii wahine i papa i kela enemi
nana i hoohaunaete, a i hoopoino i ko-
na mau aina.

RAIATEA. Make ka Misionari hou
ma Raiatea. O Loxton kona inoa; 21
kona mau makahiki. O ka manao o
kana wahine e hoi i Beritania. Holo
pu mai laua me ke aloha, a me ka ma-
nao e ao i kanaka ma Raiatea, aole i
hiki. Na ke Akua ia hana, e noho ma-
lie kakou.

NAVIGETA. Ua hana ko laila mau
kanaka i na hale pule he nui no Iehova.
Elima o ia mau hale ua hamo pono ia
me ka puna. Makemake lakou e ike i
ka olelo a ke Akua. Ua makaukau na
misionari elima e holo malaila mai Be-
ritania mai. Ua holo ka misionari o
Huahine, i kela mau aina, e ike a e
hooikaika ia lakou.

Pai hewa. Ma ka palapala a Amasa,
ua pai hewa ia na hua eha. Ua lilo na
papa i "paa," a ua lilo na paa i "papa."
E hiki i na haumana akamai ke hoopon-

hopono i ka heluhelu ana ia mau hua
hewa eha.

Pela ma ka palapala Nuuhiwa, ua
pai hewa ia ka hua "hakoahia" eia ka
pono; O ke te hakoahia. A ma kela ao-
ao, o ka hua "hooke," e pono ke helu-
helu hoike.



Honolulu, Dek. 2. Ku mai ka moku
o kohola, o Huntress ka inoa, o Post ke
alii; no Nu Bedefoda mai, 27 mau ma-
lama ka holo ana 1,400 barela aila i
loaa.

Dek. 2. Cambria, Crocker, Nu Be-
defode, 30, 1,850.

Dek. 4. Kingston. Sherman, Nane-
tuketa, 25, 480.

Dek. 4. John Coggeshall, Macy,
Nu Pota, 29, 1,400.

Dek. 4. General Jackson, Smith,
Berisetola, 29, 1,400.

Dek. 4. Corinthian, Grinnell, Beri-
setola, 24, 670.

Dek. 5. James Maury, Bigelow,
Salema.

Ua paiia ke KUMU HAWAII
ma ka mea paipalapala a na misi-
onari, Honolulu; elua hebedoma
hookahi pepa, o Wenede ka la e
pai iho ai.

Eia ke kuai ana, hookahi maka-
hiki hookahi kala, a na mea i lawe
i ka pepa a pau.

Oahu: Mission Press.—R. TINKER, Editor.
E. H. ROGERS, Printer.